



UNIVERSITETI I PRISHTINËS
"HASAN PRISHTINA"
UNIVERSITY OF PRISHTINA

Rr. Xhorxh Bush, Ndërtesa e Rektoratit, 10 000 Prishtinë, Republika e Kosovës
Tel: +381 38 244 183 • E-mail: rektorati@uni-pr.edu • www.uni-pr.edu

Nr. Prot.: 3/168

Datë: 27/9/2022

Senati i Universitetit të Prishtinës, në mbledhjen e mbajtur me datë 26.9.2022, bazuar në nenin 122 të Statutit të Universitetit të Prishtinës dhe nenin 7 të Rregullores për studime të doktoratës me nr. prot. 1/96, datë 24.6.2021, shpall:

KONKURS

për pranimin e studentëve në studimet e doktoratës në vitin akademik 2022/23

1. Universiteti i Prishtinës në studimet e doktoratës për vitin akademik 2022/2023 do të pranojë **32 (tridhjetë e dy)** studentë, në pesë (5) programe studimore në kuadër të dy (2) fakulteteve.
2. Në kuadër të numrit të përgjithshëm të përcaktuar si në paragrafin 1, bazuar në UA nr. 09/2016 MASHT-it, Universiteti do të regjistrojë deri në 12%, përkatësisht deri në **5 (pesë)** studentë të rregullt nga komuniteti jo-shumicë. Kuota prej 12% të vendeve të rezervuara për regjistrim të studentëve nga komuniteti jo-shumicë do të shpërndahet në mënyrë proporcionale sipas përqindjes së numrit të përgjithshëm të studentëve për secilin departament apo program të fakulteteve.

Fakulteti / Programi i doktoratës	Studentë	Komuniteti jo-shumicë (12%)	Gjithsej
Fakulteti Juridik	6	2	8
Programi E Drejta Kushtetuese dhe Administrative	3	1	4
Programi E Drejta Ndërkombëtare	3	1	4
Fakulteti i Mjekësisë	21	3	24
Programi Shëndet Publik	3	1	4
Programi Mjekësi Paraklinike	9	1	10
Programi Mjekësi Klinike	9	1	10
GJITHSEJ	27	5	32

I. KUSHTET E KONKURSIT

- (1) Të drejtë konkurrimi për regjistrim në studimet e doktoratës kanë kandidatët që kanë përfunduar studimet në Fakultetet, respektivisht programet përkatëse.
- (2) Në studimet e doktoratës nuk mund të regjistrohen të diplomuarit me master profesional.
- (3) Kandidatët me të drejtë aplikimi në konkurs duhet t'i plotësojnë kriteret si në vijim:
 - 3.1. Kandidatët me notë mesatare jo më të ulët se 8.00 në secilin nivel të studimeve paraprahe veç e veç (për t'u llogaritur e vlefshme nota mesatare 8.00 e më lartë në secilin nivel të studimeve, diplomat duhet të jenë të fituara së pari në nivelin baçelor e më pastaj në nivelin master).
 - 3.2. Të diplomuarit para hyrjes në fuqi të studimeve sipas Deklaratës së Bolonjës, të cilët duhet të jenë magjistra të shkencës përkatëse;
 - 3.3. Të diplomuarit pas hyrjes në fuqi të studimeve sipas Deklaratës së Bolonjës – niveli i studimeve master shkencor;
 - 3.4. Të diplomuarit në studime të integruara që kanë së paku 300 kredi European Credit Transfer System (ECTS);
- (4) Kriteret e përcaktimit të përparësisë në radhitje përzgjedhëse janë:
 - 4.1. Kandidatët duhet t'i kenë të përfunduara studimet paraprahe në njësinë akademike përkatëse, në fushën e njëjtë ose të afërt me studimet e doktoratës. Fushat e afërta përcaktohen nga njësia akademike përkatëse, vlejnjë për tërë periudhën e akreditimit të programit përkatës dhe publikohen në konkurs në kuadër të kushteve të veçanta në njësinë akademike përkatëse. Vlerësimi i fushave të kandidatëve të cilët studimet i kanë kryer në fakultetet ose universitetet tjera, bëhet nga ana e Këshillit të studimeve të doktoratës, para se të njëjtit t'i nënshtrohen provimit pranues.
 - 4.2. Nota mesatare gjatë studimeve në nivelet baçelor dhe master, përkatësisht nota mesatare e studimeve të integruara, vlerësohet maksimalisht me 30 pikë, të cilat llogariten duke shumëzuar notën mesatare aritmetike të studimeve baçelor dhe master me 3.
 - 4.3. Magjistratura nga lëmi shkencor ose specializimi relevant profesional vlerësohet me 5 pikë;
 - 4.4. Aktiviteti kërkimor - shkencor, siç dëshmohet me botimet dhe prezantimet si në vijim, vlerësohet me një vlerë maksimale deri në 15 pikë:
 - a) Për çdo artikull të publikuar në pesë vitet e fundit dhe të indeksuar në Web of Science (SCIE, SSCI dhe AHCI) dhe/ose SCOPUS (Q1, Q2): autori i parë/korrespondent 5 pikë, të tjerët 2 pikë.
 - b) Për çdo artikull të publikuar në pesë vitet e fundit dhe të indeksuar në SCOPUS (Q3, Q4) ose SCOPUS pa specifika të quartalit: autori i parë/korrespondent 4 pikë, të tjerët 1.5 pikë.
 - c) Për çdo artikull të botuar në pesë vitet e fundit në revista të tjera ndërkombëtare të indeksuara në platformat e specifikuar në rregulloren për procedurat përzgjedhëse lidhur me personelin akademik: autori i parë 3 pikë, i dyti 2 pike, të tjerët 1 pikë.
 - d) Për çdo artikull të publikuar në pesë vitet e fundit në revista akademike vendore, që botohen nga Universiteti i Prishtinës ose nga qendrat apo institutet e tij, nga Akademia e Shkencave dhe e Arteve e Kosovës, nga Instituti Albanologjik dhe nga Instituti i Historisë, të cilat i nënshtrohen recensionit profesional: autori i parë 2 pikë, të tjerët 1 pikë.
 - e) Për libër universitar të botuar në pesë vitet e fundit nga lëmi i ngushtë: autori kryesor 5 pikë, bashkautori 3 pikë gjithsej. Monografia në fushën ku aplikon kandidati vlerësohet me 4 pikë.

- f) Për çdo prezantim gojor të punimit në pesë vitet e fundit në tubime (konferenca, kongrese, simpoziume) ndërkombëtare shkencore të indeksuar dhe të botuar në përmbledhjen e punimeve: autori i parë 2 pikë, të tjerët 1 pikë.
 - g) Për çdo prezantim në formë posteri të punimit në pesë vitet e fundit në tubime (konferenca, kongrese, simpoziume) ndërkombëtare shkencore, të indeksuar dhe të botuar në përmbledhjen e punimeve: autori i parë 1 pikë, të tjerët 0.5 pikë.
 - h) Për çdo prezantim gojor në pesë vitet e fundit në tubime (konferenca, kongrese, simpoziume) shkencore me karakter vendor: autori i parë 1 pikë, të tjerët 0.5 pikë.
- (5) Publikimet në revista dhe botues të dyshimtë, siç janë të definuar në rregulloren për procedurat përzgjedhëse lidhur me personelin akademik, nuk merren parasysh.
 - (6) Në rastin e pikëve të barabarta, përparësi i jepet kandidatit që është staf i rregullt i UP-së.
 - (7) Provimi pranues organizohet dhe administrohet nga njësitë akademike, duke respektuar standardet më të larta akademike. Në rastet e prezencës së konfliktit të interesit, duhet të evitohet në tersi përfshirja e personelit përkatës në të gjitha fazat e provimit pranues.
 - (8) Komisioni pranues do të emërohet nga Këshilli i njësisë përkatëse akademike.
 - (9) Kandidatët kanë të drejtë t'i nënshtrohen provimit pranues, vetëm nëse paraprakisht komisioni përkatës i fakultetit konstaton se të njëjtit i plotësojnë kushtet e konkursit dhe kanë dorëzuar dokumentacionin e kompletuar.
 - (10) Provimi pranues përfshin provimin lidhur me aspektin profesional/shkencor dhe provimin lidhur me nivelin e njohjes së gjuhës angleze.
 - (11) Nga pjesa profesionale e provimit pranues kandidatët mund të fitojnë maksimalisht 30 pikë.
 - (12) Pjesa e provimit pranues lidhur me nivelin e njohjes së gjuhës angleze është e njëjtë për të gjitha njësitë akademike dhe është e obligueshme për të gjithë kandidatët. Nëse kandidati dëshmon që ka certifikatë të vlefshme ndërkombëtare TOEFL me së paku 79 pikë (ose IELTS me së paku 5.65 pikë), i njëjti me automatizëm merr 10 pikë, ndërsa pikët tjera lidhur me gjuhën angleze shtohen varësisht nga sukcesi i treguar në provimin pranues - pjesën e gjuhës angleze. Njohuria e gjuhës angleze vlerësohet maksimalisht me 20 pikë.
 - (13) Kandidatët kanë të drejtë të renditen në listë pasi të kenë kaluar pragun e kalueshmërisë të provimit pranues, përkatësisht pasi të kenë arritur së paku 50 të pikëve të pjesës profesionale dhe 50 % të pikëve të pjesës lidhur me gjuhën angleze.

II. KUSHTET E VEÇANTA TË KONKURSIT TË PËRCAKTUARA NGA FAKULTETET PËRKATËSE

FAKULTETI JURIDIK

1. Programi E Drejta Kushtetuese dhe Administrative

Të drejtë aplikimi kanë kandidatët, të cilët kanë përfunduar studimet në drejtimin: *Juridik, E Drejta Kushtetuese, E Drejta Publike dhe E Drejta Krahasuese.*

Pjesa e provimit me shkrim (sipas programit të akredituar) do të organizohet nga lëndët/fushat: E drejta kushtetuese (kurs i avancuar), E Drejta Administrative e avancuar dhe Teoria e përgjithshme e së drejtës.

2. Programi E Drejta Ndërkombëtare

Të drejtë aplikimi kanë kandidatët, të cilët kanë përfunduar studimet në drejtimin: *Juridik, E Drejta Ndërkombëtare, Marrëdhënie Ndërkombëtare dhe Diplomaci, E Drejta Krahasuese, E Drejta Publike dhe E Drejtë Komunitare/Evropiane.*

Pjesa e provimit me shkrim (sipas programit të akredituar) do të organizohet nga lëndët/fushat: *Teoria e Marrëdhënieve Ndërkombëtare, E Drejta Ndërkombëtare Publike, E Drejta e Unionit Evropian.*

Për të dyja programet:

- a) Fushat e përafërta/drejtimet si dhe sistemet e studimeve (si p.sh.: sistemi amerikan) që mund të jenë ekuivalente, do të interpretohen dhe vlerësohen nga Komisioni/Këshilli i Doktoratës.
- b) Nga pjesa profesionale e provimit pranues siç është përcaktuar në pikën (11) të kushteve të këtij konkursi, kandidatët mund të fitojnë maksimalisht 30 pikë. Në kuadër të provimit Pranues profesional për Fakultetin Juridik në vlerësim do të bëjë pjesë *testi me shkrim dhe Konceptin ideor i hulumtimit*, i cili duhet të dorëzohet në momentin e aplikimit (shih pjesën e këtij konkursi: Dokumentet e nevojshme për aplikim, Pika 6. *Konceptin ideor të hulumtimit*).
- c) Kandidati/ja duhet ta dorëzojë një kopje të punimit të masterit/magjistraturës, siç është dorëzuar apo protokolluar zyrtarisht në administratën e këtyre studimeve.
- d) Në kuadër të kriterit për dorëzim të *Konceptit ideor të hulumtimit* (pika III/6 e konkursit): (i) kandidati/ja duhet të dorëzojë një koncept ideor origjinal përmes të cilit artikulon preferencën, vizionin dhe metodologjinë e tij/saj për zhvillimin e një projekti hulumtues në një fushë ose temë specifike të drejtimit përkatës. Në aspektin teknik, ky propozim duhet të paraqitet përmes një teksti prej më së shumti 10 faqeve të programit *Word*, me madhësi shkronjash nr. 12 dhe pa hapësira midis rreshtave. Përmes *Konceptit ideor të hulumtimit*, kandidati/ja duhet të dëshmojë njohuri të thelluara nga literatura bashkëkohore në fushën ku ai/ajo konkurren për një pozitë në studimet e doktoratës. Ai/ajo duhet të jetë në gjendje ta bëjë të besueshëm guximin intelektual për të shfrytëzuar një bibliografi të gjerë të huaj e cila shkon përtej standardit lokal të hulumtimit shkencor, dhe (ii) kandidati/ja duhet të dëshmojë njohuri të thelluar të praktikës gjyqësore ndërkombëtare/të krahasuar në fushën ku ai/ajo konkurren të realizojë studimet e doktoratës. Njohuritë e tilla duhet të dëshmojnë si në aspekte formale ashtu edhe materiale të praktikës gjyqësore, me theks të veçantë tek praktika gjyqësore e Gjykatës Evropiane për të Drejtat e Njeriut apo juridiksionet individuale shtetërore me peshë në të drejtën bashkëkohore.
- e) Pas testit me shkrim, kandidatët, do të ftohen të bëjnë një prezantim të Konceptit ideor të hulumtimit të dorëzuar, duke iu ofruar edhe mundësinë që prezantimin ta bëjnë në gjuhën angleze.

FAKULTETI I MJEKËSISË

1. Programi Mjekësi klinike

Të drejtë aplikimi kanë kandidatët, të cilët kanë përfunduar studimet në drejtimin *Mjekësi e Përgjithshme.*

2. Programi Mjekësi Paraklinike

Të drejtë aplikimi kanë kandidatët, të cilët kanë përfunduar studimet në drejtimin *Mjekësi e Përgjithshme, Stomatologji dhe Farmaci.*

3. Programi Shëndet Publik

Të drejtë aplikimi kanë kandidatët, të cilët kanë përfunduar studimet në drejtimin Mjekësi e Përgjithshme, Stomatologji, Farmaci, Shkenca natyrore, Veterinari dhe çfarëdo studimi master kombëtar ose ndërkombëtar diploma e të cilëve është e barasvlershme me diplomat e mësipërme.

Kandidatët, për pjesën profesionale, do të nënshtrohen provimit për njohuritë nga fusha e *Metodologjisë së punës shkencore*.

Kandidati/ja në programet e doktoratës në Fakultetin e Mjekësisë duhet të dorëzojë *Konceptin ideor të hulumtimit* origjinal në fushën përkatëse të programit të doktoratës që aplikon.

Përmes *Konceptit ideor të hulumtimit* kandidati artikulon idenë hulumtuese, vizionin dhe metodologjinë e tij/saj për zhvillimin e një projekti hulumtues në një fushë ose temë specifike të drejtimit përkatës. Koncepti ideor i hulumtimit duhet të përmbajë hyrjen me artikullimin e problemit hulumtues dhe mbështetjen me literaturë të publikuar në revista prestigjioze, pastaj rëndësinë shkencore të konceptit ideor të hulumtimit, qëllimet, hipotezat dhe metodologjinë e përmbledhur me të cilën planifikohet ai hulumtim, si dhe literaturën (së paku 10 referenca përkatëse).

Në aspektin teknik, ky propozim duhet të paraqitet përmes një teksti të shkruar prej më së shumti 3 faqeve të programit *Word*, me madhësi shkronjash nr. 12 dhe pa hapësira midis rreshtave.

III. DOKUMENTET E NEVOJSHME PËR APLIKIM

Parakusht për vlerësimin e kandidatëve është dorëzimi i dokumentacionit si në vijim:

1. Certifikatën ose ekstraktin e lindjes (origjinale dhe jo më të vjetra se gjashtë (6) muaj);
2. Diplomën dhe certifikatën e notave (origjinale ose të noterizuara) nga nivelet studimeve paraprake në studimet bacheloret, master ose magjistratura shkencore, ndërsa për Fakultetin e Mjekësisë diplomën dhe certifikatën e notave nga niveli i studimeve themelore (5-6 vjeçare);
3. Kandidatët që kanë kryer shkollimin jashtë Republikës së Kosovës, duhet t'i nënshtrohen procesit të njohjes së diplomës, me qëllim të vazhimit të studimeve, duke ndjekur procedurën sipas Statutit të Universitetit të Prishtinës;
4. Biografinë;
5. Letrën motivuese (në të cilin arsyetohet interesi për kërkime shkencore/artistike në lëmin përkatës);
6. Konceptin ideor të hulumtimit;
7. Rekomandimet e dy profesorëve nga lëmi përkatës;
8. Dëshmitë (origjinale ose të noterizuara) për njohjen e gjuhës angleze (nëse posedojnë certifikatë ndërkombëtare TOEFL me se paku 79 pikë ose IELTS me se paku 5.65 pikë);
9. Dëshmitë lidhur me publikimet / prezantimet nga veprimtaria kërkimore-shkencore (nëse posedojnë);

Paraqitja e dokumenteve të kompletuara bëhet në Fakultetet përkatëse në formë fizike dhe përmes aplikimit elektronik, në adresën: apliko.uni-pr.edu

IV. AFATET E KONKURSIT

- a) **Konkursi hapet nga data 27.9.2022 deri më 7.10.2022.**
- b) **Pjesa profesionale e provimit pranues mbahet me datë 12.10.2022, në orën 09:00.** Informatat për sallat e mbajtjes së provimit pranues, do të publikohen në uebfaqe të fakultetit përkatës.
- c) **Pjesa e provimit pranues lidhur me njohjen e gjuhës angleze** organizohet më **13.10.2022**, në orën **09:00**, në Fakultetin e Filologjisë. Informata për sallat e mbajtjes së provimit, do të publikohen në ueb faqe të fakultetit.
- d) **Rezultati preliminar:** do të shpallet me datë **17.10.2022**, deri në orën **12:00**.
- e) **Ankesat e kandidatëve** do të pranohen me datën **18.10.2022** dhe **19.10.2022**, deri në orën **16:00**. Ankesat për provimin profesional bëhen ne fakultetin përkatës ku është realizuar provimi, ndërsa për provimin e gjuhës angleze behën ne fakultetin Filologjik. Ankesat e kandidatëve shqyrtohen nga Komisioni për ankesa i njësisë përkatëse akademike.
- f) **Rezultati përfundimtar:** Njësitë përkatëse akademike, pas shqyrtimit të raportit të komisionit të ankesave hartojnë listat e kandidatëve të propozuar në nivel të njësive akademike dhe deri më **21.10.2022** i dërgojnë për shqyrtim në Këshillin qendror të studimeve të doktoratës. Senati i Universitetit, bazuar në propozimin e njësisë akademike dhe Këshillit qendror të studimeve të doktoratës, merr vendim përfundimtar për pranimin e studentëve në studimet e doktoratës. Emrat e kandidatëve të pranuar, me të gjitha të dhënat e kritereve të përzgjedhjes, shpallen publikisht në ueb faqen e njësive akademike dhe në ueb faqen e Universitetit.
- g) Data e regjistrimit të kandidatëve të pranuar do të publikohet pas vendimit përfundimtar të Senatit.

